

AD TITUM

Capitulum: 1 2 3

CAPITULUM 1

Paulus servus Dei apostolus autem Iesu Christi secundum fidem electorum Dei et agnitionem veritatis quae secundum pietatem est

² in spem vitae aeternae quam promisit qui non mentitur Deus ante tempora saecularia

³ manifestavit autem temporibus suis verbum suum in praedicatione quae credita est mihi secundum praeceptum salvatoris nostri Dei

⁴ Tito dilecto filio secundum communem fidem gratia et pax a Deo Patre et Christo Iesu salvatore nostro

⁵ huius rei gratia reliqui te Cretae ut ea quae desunt corrigas et constituas per civitates presbyteros sicut ego tibi disposui

⁶ si quis sine crimine est unius uxoris vir filios habens fideles non in accusatione luxuriae aut non subditos

⁷ oportet enim episcopum sine crimine esse sicut Dei dispensatorem non superbum non iracundum non vinolentum non percussorem non turpilucris cupidum

⁸ sed hospitalem benignum sobrium iustum sanctum continentem

⁹ amplectentem eum qui secundum doctrinam est fidelem sermonem ut potens sit et exhortari in doctrina sana et eos qui contradicunt arguere

¹⁰ sunt enim multi et inoboedientes vaniloqui et seductores maxime qui de circumcisione sunt

¹¹ quos oportet redargui qui universas domos subvertunt docentes quae non oportet turpis lucris gratia

¹² dixit quidam ex illis proprius ipsorum propheta Cretenses semper mendaces malae bestiae ventres pigri

¹³ testimonium hoc verum est quam ob causam increpa illos dure ut sani sint in fide

¹⁴ non intendentes iudaicis fabulis et mandatis hominum aversantium se a veritate

¹⁵ omnia munda mundis coinquinatis autem et infidelibus nihil mundum sed inquinatae sunt eorum et mens et conscientia

¹⁶ confitentur se nosse Deum factis autem negant cum sunt abominati et incredibiles et ad omne opus bonum reprobi

CAPITULUM 2

tu autem loquere quae decet sanam doctrinam

² senes ut sobrii sint pudici prudentes sani fide dilectione patientia

³ anus similiter in habitu sancto non criminatrices non vino multo servientes bene docentes

⁴ ut prudentiam doceant adolescentulas ut viros suos ament filios diligant

⁵ prudentes castas domus curam habentes benignas subditas suis viris ut non blasphemetur verbum Dei

⁶ iuvenes similiter hortare ut sobrii sint

⁷ in omnibus te ipsum praebe exemplum bonorum operum in doctrina integritatem gravitatem

⁸ verbum sanum inreprehensibilem ut is qui ex adverso est vereatur nihil habens malum dicere de nobis

⁹ servos dominis suis subditos esse in omnibus placentes non contradicentes

¹⁰ non fraudantes, sed in omnibus fidem bonam ostendentes ut doctrinam salutaris nostri Dei ornent in omnibus

¹¹ apparuit enim gratia Dei salutaris omnibus hominibus

¹² erudiens nos ut abnegantes impietatem et saecularia desideria sobrie et iuste et pie vivamus in hoc saeculo

¹³ expectantes beatam spem et adventum gloriae magni Dei et salvatoris nostri Iesu Christi

¹⁴ qui dedit semet ipsum pro nobis ut nos redimeret ab omni iniquitate et mundaret sibi populum acceptabilem sectatorem bonorum operum

¹⁵ haec loquere et exhortare et argue cum omni imperio nemo te contemnat

CAPITULUM 3

admone illos principibus et potestatibus subditos esse dicto oboedire ad omne opus bonum paratos esse

² neminem blasphemare non litigiosos esse modestos omnem ostendentes mansuetudinem ad omnes homines

³ eramus enim et nos aliquando insipientes increduli errantes servientes desideriis et voluptatibus variis in malitia et invidia agentes odibiles odientes invicem

⁴ cum autem benignitas et humanitas apparuit salvatoris nostri Dei

⁵ non ex operibus iustitiae quae fecimus nos sed secundum suam misericordiam salvos nos fecit per lavacrum regenerationis et renovationis Spiritus Sancti

⁶ quem effudit in nos abunde per Iesum Christum salvatorem nostrum

⁷ ut iustificati gratia ipsius heredes simus secundum spem vitae aeternae

⁸ fidelis sermo est et de his volo te confirmare ut curent bonis operibus praeesse qui credunt Deo haec sunt bona et utilia hominibus

⁹ stultas autem quaestiones et genealogias et contentiones et pugnas legis devita sunt enim inutiles et vanae

¹⁰ hereticum hominem post unam et secundam correptionem devita

¹¹ sciens quia subversus est qui eiusmodi est et delinquit proprio iudicio condemnatus

¹² cum misero ad te Arteman aut Tychicum festina ad me venire Nicopolim ibi enim statui hiemare

¹³ Zenan legis peritum et Apollo sollicite praemitte ut nihil illis desit

¹⁴ discant autem et nostri bonis operibus praeesse ad usus necessarios ut non sint infructuosi

¹⁵ salutant te qui mecum sunt omnes saluta qui nos amant in fide gratia Dei cum omnibus vobis amen

For other languages please go to **www.wordproject.org**